

La Pagina

da Surmeir

ECONOMIA

emda
49

SAVOGNIN: construcziun digl hotel a Grava antscheva la premaveira 2018

En hotel per dar curasch

pb. Enrico Uffer cun la sia interpresa vot metter en term aint igl svilup turistic dalla destinaziun Savognin/Surses. Igl 2020 duess star ainten la zona da center a Grava en nov hotel da *** steilas cun 100 tgombras, 200 letgs e gastronomia. Schibagn la finanzaziun scu er igl travagl digl hotel èn garantias.

L'istorgia digls davos diesch onns digls hotels alla destinaziun Savognin/Surses n'è betg gist fitg gloriosa. Bliers projects èn nias elaboros, preschentos ed on survagnia igl sustign digl mang public e la lubientscha. Pero anfignen dato è betg en sulet nia realisato. Er igl hotel da *** steilas alla veia Sandeilas betg. Ed igl mument dattigl er nigns segns scu tgi ins gess proximamaintg ved la construcziun. Tiers chegl è la decisiun digl possessour e manader digl Cube Hotel da sarar la tgesa, sainza saveir scu tgi vo anavanntn, mess quasi igl punct segl «i» da chella spirala negativa.

Ossa duess chegl midar. Per marde passo è la Uffer SA cun Enrico Uffer anvido ad ena conferenzas dallas me-

cuntinuaziun p. 2



Enrico ed Andrea Uffer ainten ena tgombrà pussebla per igl hotel a Grava tenor igl model da Quadrin.

SURVISTA

La biblioteca anc adegna attractiva

Tiers tot las pussebladads digitalas da neir tar infurraziun e divertimaint medial, è la biblioteca betg pers la sia muntada. Chegl resorta digl rapport annual dalla Biblioteca populara Savognin. Naturlamaintg tgi er chella è gia da s'adattar allas novas sfidas dad oz.

3

Surses: daples expensas

Tenor igl preventiv preschento alla radunanza communal digl cumegn da Surses glindesde passo suonndan onns manc fermes puncto finanzas. Igl muteiv è tgi las expensas creschan e las antradas sa sminueschan. Anc adegna ins niro a saveir preschentar en chint positiv.

6

Gi da Nadal a Savognin

I vo vers Nadal. Chel taimp tgi er las scolas sa preschaintan sen tribuna cun tocs per chel taimp. Er igl scalem bass dalla Scola Surses.

14

Las notas segl tablet

Igls commembers digls chors e dallas furmaziuns da musica on lour notas ainten ena mappa. Chegl saron bod taimps passos.

18

dias. E chegl cun igl intent dad infurmar sur digl digl project «Grava». Vot deir sur dalla construcziun dad en hotel ainten la zona turistica centrala a Savognin. Er en project tgi è gio da divers onns an discussiun. Igl messadi dalla comunicaziun dad Enrico Uffer è dantant sto absolutamaintg positiv. Ed el ò sottastritgia chel fatg cun mussar segl li tgi ins è vedlonder da sbuar la «Bretterhalle». Sen chel areal sen ena surfatscha da 4000 m² tgi totga a Savognin Pencilularas duess la premaveira 2019 neir fatga l'amprema bade gliada per la construcziun digl hotel. Per la staschung d'anviern 2020/21 duess el neir avert. Pero la comunicaziun la pi impurtanta è stada chella tgi schibagn la finanziaziun scu er igl travagl èn garantias. Chegl tgi ins ò anc betg fatg è da communitgier igl nom digl investor e digl manader digl hotel. Cò dattigl scu para anc dumondas formalas da sclareir, vign pero communitgia anc durant igl anviern.

Piglia igls profis ainten la bartga

«Igl davos meis ègl ia fitg spert cun igl svilup digl project», ò declaro Enrico Uffer. «Ossa ischans schinavant e pudagn eir vedlonder. I duvragn angal ple la lubientscha per biagier». Igl manader dalla Uffer SA vot pero betg veir igl project digl hotel a Grava (igl nom è anc betg ancunaschaint) scu project singul. Mabagn scu en'antschatta per augmentar l'attractivitat turistica agl center da vischnanca sot. E chegl schibagn per igls giasts scu er per igls indigens.

Enrico Uffer ò er tradia tgi seia do en mument tgi el leva piglier sez ainta mang igl antier project, neir ansemen cugls daners e manar igl travagl. El seia pero nia piglia giu dallas neivlas. «Oz sunga led tgi vagn alloura tutte gna decida da piglier igls profis ainten la bartga. Chels on en grond avantatg dad experientscha ed er gio lour reit da contacts». Pertutgont igl investor discorra igl schef dalla Uffer SA da partenaris serious ed ins vegia examino els davains e dafora. Davart digls iniziants ins seia cun inverstor e manader an cumplagna concordanza.

En segn per la clera voluntad dad eir finalmaintg anavant cun igl svilup turistic a Savognin seia ossa er la construcziun cun igls moduls da Quadrin per en affar da service e vendita dad artetgels da sport d'anviern tar la staziun a val dalla soptgera. Chegl ansemen cun igl manader digl affar da sport Wasescha Sport, Rico Arpagaus e cun Savognin Pencilularas. Chel bietg è igl mument an construcziun e l'emda proxima duess el gio neir indrizzo.

Igl territori da skis antscheva ainten vischnanca

Patric Vincenz, igl sviluppader da project tar la Uffer SA ò preschento alloura igl project digl hotel aint igl quartier da Grava. El punctuescha tgi la realisaziun seia er angal pus-



Enrico Uffer ò lia dar en cler segn per la seriousness digl project digl hotel a Grava cun antschever a sbuar la «Bretterhalle» agl areal noua tgi igl hotel vign a star.

sebla antras ena tenuta positiva dalla populaziun. Ainten diversas radunanzas communalas vegian igls votants do en sustign schi cler ed impressiunont per tals projects. Er per igl project a Grava. Chegl vegia tranter oter er ena ferma radiaziun anvers anor. Er per tschartger e cattar investors.

Igl hotel an discussiun vign construa agl sistem da moduls cun igl concept da Quadrin scu er gio applitgia p.ex. tar igl Hotel Beverlodge an Nagiadegna. Cun las 100 tgombras ed igls 200 letgs duess el generar circa 18 000 pernottaziuns ad onn. Igl costs persiva montan a 15 miu. francs. Essend tgi igl hotel vign construa dall'interpresa Uffer SA sezza resta er ena gronda part dalla creaziun da valour ainten la val.

Igl hotel survign er ena atgna gastronomia tgi è publica. En grond avantatg saro, tenor Patric Vincenz, er tgi giasts digl hotel pon eir or da tgesa e metter se igls skis ed eir tar la telecabina da 10 tgi saro pronta ed els pon puspe turnar anfignen davant igl hotel. La Uffer SA dat igls 4000 m² alla societad acziunara digls investgors sen dretg da biagier.

I vo angal comunabel

Christian Prinz, igl directer administrativ da Savognin Pencilularas benevainta igl project digl hotel a Grava. El è persvadia, scu ossa tar igl affar da sport alla staziun dalla soptgera, tgi igl turissem saptga eir anavant ed aveir success angal schi ins geia la veia comunabla. Naturalmaintg seian daples letgs ainten la destinaziun impuls impurtants er per las pencilularas. Ed el manegia tgi er per la con-

strucziun dalla nova telecabina ed ulteriouras investiziuns ainten l'infrastructra seian tals segns fitg positivs: «Nous biagiagn perche gl tgi vusoters biagez, igl angaschamaint dall'interpresa Uffer SA ainten chella direcziun è exemplaric», ò managea Christian Prinz.

Andreas Bärtsch, represchentant dad ena interpresa consulenta ò ludo la visiun communalabla da tots participos. Igl spiert seia bung e la clera tenuta mademamaintg. I geia ossa per contanscher ena bunga occupaziun digl hotel. Impurtant seia cò igl stgamgiamaint e betg a tot prietsch ena optimaziun digls costs.

Alla fegn manegia Enrico Uffer tgi chest project duess aveir en effect da signal. El vei chegl er scu igl ampren crap digl domino tgi croda e tgi vo egn siva l'oter. An nign cass veia el betg la concorrenza scu ensatge negativ. Anzi, antras la concorrenza ins davainta ferm, innovativ ed ella suletta porta anavant. Tanja Amacher, la directoura da Turissem Savognin Beiva Alvra ò er benevento igl project ed angraztgea agls iniziants per igl curasch e per igl angaschamaint.

Leo Thomann, igl mastral digl cumegn da Surses ò catto plets sumigliants per mussar igl sies respect ed igl sies angraztgamaint per igl project «Grava».

Digl reminent: igls 11 da december 2018, allas 20.30, vign salvo ainten la sala polivalenta a Salouf en'occurranza d'orientaziun per preschentar igls projects per en hotel e per en resort da vacanzas agls Viols, Savognin. I para veiramaintg dad eir anavant ed ins dastga angal sperar tgi tot catta ena buna fegn.